



## Diretives per n'adurvanza nia descriminënta dla rujeneda

---

aldò dl articul 8 dla lege provinziela di 8 de merz 2010, n. 5 (Lege sun la parificazion y sun l sustëni dl'ëiles dla Provinzia autonoma de Bulsan); publichedes tl Buletin Ufiziel dla Region n. 48 di 2 de dezëmber dl 2021, plata njunteada n. 2

---

# Indesc

PAROLES DANORA .....	3
Carateristiches dl lingaz aministratif .....	5
1 FUNDAMËNTES DL'ADURVANZA NIA DESCRIMINËNTA DLA RUJENEDA .....	6
1.1 Forma dopla .....	6
1.1.1 Forma dopla ntiera .....	6
1.1.2 Formes dopes curtes: rissa desbiech y cramples .....	7
1.1.3 Formes dopes pra denuminazions de prufescion, de ncëria y de funzion .....	8
1.2 Formulazions neutreles .....	10
1.2.1 Formes neutreles de denuminazion de personnes .....	10
1.2.2 Sustantifs genericos astrac .....	11
1.2.3 D'autra manieres de scri .....	11
1.2.3.1 Formulazions cun "chi che" .....	11
1.2.3.2 Costruzions passives o descrizioni verbales .....	12
1.2.3.3 Adurvanza de n agetif mpede n sustantif maschil o feminil .....	12
1.2.3.4 Adressamënt persunel .....	12
1.2.3.5 Co schivé massa denuminazions de personnes, de ncëries y funzioni ndolauter .....	12
1.2.3.6 Schivé I maschil generich .....	12
1.3 D'autra usservazions .....	13
1.3.1 L + verb tla forma passiva .....	13
1.3.2 N + verb tla forma ativa .....	13
1.3.3 Tituli .....	13
1.3.4 Articuli .....	13
1.3.5 Plurel .....	14
2 TRATAMËNT VALIF DL'ËILES TLA LEGISLAZION .....	15
2.1 Formes dopes ntieres y curtes .....	15
2.2 Soluzions criatives tla legislazion .....	15
2.2.1 Chi che .....	15
2.2.2 Formulazions y denuminazions neutreles .....	15
2.2.3 Denominazions coletives te tesć giuridics .....	16
2.2.4 Reformulazion dla frasa .....	16
2.3 Persones giuridiches y sogec de dërt .....	17
2.4 Linges de denuminazions de personnes, ncëries y funzioni .....	17
2.5 Mudaziun de normes de lege .....	18
3 TESĆ AMINISTRATIFS N GENEREL .....	19
3.1 Tesć amministratifs che ie adressesai a personnes singules .....	19
3.2 Formuleres y dumandes .....	19
3.3 Avise, indicazioni, cuidejiei, material de nfurmazion y tesć semienc .....	21
3.4 Brosciures y d'autra publicazions .....	21
3.5 Tesć per l internet .....	22
4 CUNTLUJION .....	23
Bibliografia .....	24

## PAROLES DANORA

Tla Talia ie la valivanza dl'ëiles y di ëi scrita dant dal art. 51 dla Costituzion. La lege sun la parificazion y l'sustëni dl'ëiles dla Provinzia Autonoma de Bulsan-Südtirol (lege provinziela di 8 de merz 2010, n. 5) vëij danora, danter d'autra despusizions sun la parificazion, tl articul 8, che "la leges provinzieles, i regulamënc y la delibres dla Jonta provinziela y nce i regulamënc y i ac aministratifs dl'amministrazion provinziela à da unì formulei te na rujeneda respetëusa dla identità de gene."<sup>1</sup>

La cundizions legeheles ie cundechël bele unides criedes dan n pez – šën vala for mo de realisé chisc prinzips tla vita da uni di. Chësta directives dëssa judé a realisé la valivanza de ëiles y ëi ti tesć dl'amministrazion publica.

La rujeneda ie presënta te duc i raions dla vita soziela. L'ëiles dëssa – alincontra de coche l'fova zacan, canche les univa for mé "minedes implizitamënter" – vester da udëi plu cuncretamënter te n test, ajache mé sce les ie da udëi ora nce a livel linguistich vénieles "perzepides a na maniera cuscienta" da chi che liej. Tuedes scientifiches mostra tlermënter che la rujeneda nfluenzea nosta maniera de pensé y nosta perzezion dla realità. L'ie desmustrà che tesć scric te n lingaz nia descriminënt mët l'ëiles plu tl zënter dla cuscienza de chi che liej che tesć che ie "mé" unic formulei cun l "maschil generich" – chësc uel dì a na maniera "mé maschila".<sup>2</sup> Na rujeneda nia descriminënta porta perchël pro ala realisazion dla valivanza dl'ëiles y di ëi y la ulentà de arjonjer chësta cundizion soziela se refletea nsci nce a livel linguistich.

Tlausules generiches miredes a giustifiché l'adurvanza dl'maschil generich te n test ne respetea nia la valivanza di gendri y nianca no cërtä detlarazions che dëssa giustifiché l'fat de ne adurvé nia formes dopes sciche p.ej. la formulazion "espertes y esperc tlamei da moinlå esperc." La tlausula vën defati tosc inò desmincëda y cie che resta ntan che n liej ie mé la perzezion dl'maschil.

Chësta directives dëssa mustré sù la puscibleties che la rujeneda ladina pieta acioche l'ëiles sibe nce da udëi ora ti tesć per ladin. Les dëssa oradechël mustré coche n possa formulé tesć a na maniera neutrela zënza che la truepa formes dopes limiteie la lijbiltà dl' test. Chi che uel scrì n test nia descriminënt che sibe nce tler y posse unì liet saurì ne dassëssa nia mé se tenì a un n model star, ma purvé a nuzé cun criatività la truepa puscibleties de formulazion. Chëles plu mpurtantes vën presentedes te chësc scrit.

L'ladin ie n lingaz neolatin cun na strutura sintatica y gramatichela semienta a chëles dl' talian, franzëus, spanuel y nsci inant, rujenedes cun chëles che l'ie mparentà. Alincontra de coche la ie te cér paejes sciche per ejëmpl te chëi de rujeneda scandinava, nglëija o tudëscia, che à na tradizion relativamënter longia de crissa de mesuns per n'adurvanza nia descriminënta dl'lingaz, ie la ulentà de traté a na maniera linguisticamënter valiva ëiles y ëi da nëus for mo plutosc limiteda. Per n valguna rujenedes – sciche per ejëmpl per l'nglëisc, che ne defrenziëia nia i sustantifs danter tei maschii, feminii o neutrei, o l'tudësch, che à n genus neutrel, y te chël che l'adurvanza de formes passives y sustantivations astrates y d'autri mesuns linguistics vën dant scialdi svvënz – semea l' tratamënt valif de ëiles y ëi tl'lingaz vester manco zariëus che no ti lingac neolatins.

Purempò àn nce ti paejes sciche la Talia, la Franzia o la Svizra (taliana, franzëusa y rumancia) ti ultimi ancià de fé crëscer la sensiblità dla personnes per n'adurvanza nia descriminënta dla rujeneda, ajache i mudamënc de nosta soziétà y dl'mond ntier cumporta nce l'mudamënt dl'lingaz y l'lingaz da si pert nfluenzea i cumputamënc y la manieres de udëi l'mond purtan nsci pro a mudé o almanco a mëter n'descuscion cërtà strutures sozieles nstarides.

L'adurvanza nia descriminënta dl'lingaz ie pert dla tematica plu ampla dla scemplificazion dl'lingaz aministratif. Ti ultimi dejeneies iel unì fat de plu sforc de chësc viers. N'lëur da pionier ie tla Talia p.ej. stat la recumandazions per n'adurvanza nia descriminënta dla rujeneda ("Il Sessismo nella Lingua Italiana") lauredes

<sup>1</sup> Te chësc test vëniel adurvanza mpede la parola "gene" la parola "gender". Auter che l'genus, che denutea la categoria gramatichela (maschil o feminil) vën la parola "gender" adurveda n referimënt ai umans per denuté l'carater maschil o feminil dl'individuum, nce te n senificat biografich, sozial, prufesciunel coche tla espreszion identità de gender minan limpea la custelazion de carateri anatomicos y funziunei, psichics y cumputamentei che definea l'gender nstës y nce chël che l'individuum sënt sie, azetea y viv tla storia dla familia da chëla che l'vën y tla soziétà te chëla che l'viv.

<sup>2</sup> La paroles "maschil" y "feminil" vën tlo adurvedes per denuminé la categoria gramatichela y l'gender n curespundënsa alla terminologia taliana "maschile" y "femminile" y a chëla tudëscia "männlich" y "weiblich". Alincontra mienien tlo cun la paroles "masculin" y "feminin" "da ël" o "da ëila" sciche p.ej. tla frases "Piere à n fé scialdi feminin" o "Paula à na usc masculina".

ora da Alma Sabatini per la *Cumision naziunela per la valivanza dla chances danter ëiles y ëi pra la Presidënsa dl Cunsëi di Ministri* y bele publichedes dl 1987. Oradechël à nce l *Dipartimento della Funzione pubblica* dat ora, tl 1994, l "Codice di stile ad uso delle amministrazioni pubbliche" y tl 1997 l "Manuale di stile" (de A. Fioritto, Il Mulino) che pieta strumënc de utl y cunsëies per scemplifiché la rujeneda dla aministrations pubbliches y che trata te chësc cuntest nce la problematica de n'adurvanza nia descriminënta dla rujeneda. Per d'autra funtanes cialëde prëibel do dovia pra la bibliografia.

L lingaz adurvà tl'aministrazion publica ie formà da n lessich de basa aministratif y giuridich y da na terminologia spezialistica ti ciamps defränc dl'attività aministrativa.

Na carateristica dl lingaz burocratich ie si furmatalità. I ac aministratifs à da responder ai bujëns dla legislazion y ie perchël liei a cér lessems formeis che garantësc si curetëza. La furmatalità dl at determinea nce la furmatalità dla rujeneda, che vën suvënz sentida sciche stara y cun puecia pusciblteies de scemplificazion.

Dal'autra pert iel n dërt dla zitadines y di zitadins pudëi ntënder la rujeneda dl'aministrazion y dla legislazion y perchël dassëssela pudëi unì ntenduda da duta la personnes, da chi che à studià y da chi che ne à nia studià, dal'ëiles y dai ëi, y, cie che ie de mpurtanza: ëiles y ëi dëssa pudëi se senti adressei ala medema maniera.


L lingaz aministratif y legislatif ie generalmënter adressà a n publich generich. La forma maschila (chëla che vën tlameda l "maschil generich") vën tlo suvënz adurveda – tl ladin sciche nce te d'autra rujenedes – sibe n referimënt ai ëi che al'ëiles, p.ej. tl cajo de formes sciche "l zitadin", "l damandant", "l presidënt". Cun chësta formulazion vën l'ëiles sambën mé "minedes pea" uel dì minedes "implizitamënter". Ma pervia dl mudamënt dla realtà, dla cuscienza y sensiblità dla personnes n chësc cont y dla rujeneda nstëssa vën l maschil generich ultimamënter for plu criticà y nia plu sënti y ratà adatà a nosc têmps.

Pervia che la posizion dl'ëila y si funzion soziela, politica y prufessionela se à mudà y à al didancuei n majer pëis a uni livel iel ènghes de bujën de denuminé chësta si funzions tres formulazions che porta pro a fé a na moda che l'ëiles devénte plu "vijibles" tla rujeneda. L'ëiles che fej, oradechël, monce ora numericamënter la majera pert dla populazion ne dëssa nia mé plu unì "minedes pea."

L'aministrazion dla Provinzia autonoma de Bulsan ie cuscienta de chësc svilup. Perchël cèlela de tò mesures defrëntes che mira a n'adurvanza dl lingaz aministratif adateda ala cunditions sozieles y politiches de ncueicundi.

Chësta directives ie mé n var de n pruzes de viers de na rujeneda manco descriminënta che durerà mo ani. La pusciblteies y i ejëmpli tlo repurtei dëssa mé vester n impuls y n aiut d'urientamënt per chi che scrij tesç aministratifs. L se trata de cunsëies pratics per n'adurvanza dla rujeneda che tén cont sibe di ëi che dl'ëiles; l'esperienza mustrerà po ulache n puderà miuré se nuzan mo d'autra pusciblteies. La rujeneda, duta la rujenedes vives, nce chëla ladina, ie daniëura y tresora n muvimënt, les vën mudedes dala realtà soziela che se muda y che la rujeneda nstëssa refletea y reprejentea. La directives tlo dessot dëssa nce purté pro a na rujeneda aministrativa plu tlera, plu daujin ala jënt y plu rëidla.

## Caracteristiche dl lingaz aministratif



# 1 FUNDAMËNTES DL'ADURVANZA NIA DESCRIIMINËNTA DLA RUJENEDA

## Pusciblteies de n tratamënt valif de ëiles y ëi

La rujeneda pietà de plu pusciblteies per traté valivamënter ëiles y ëi. L ne ie deguna rezeta idealà per adurvé chësta pusciblteies tla sortes defrèntes de tesç. Cun n pue' de eserzize y criatività se lascia belau uni test scrì a na maniera respetëusa per ëiles y ëi zënza deventé perchël rie da liejer y da ntënder.

Tlo dessot mustrons su la pusciblteies plu mpurtantes che l ladin nes pietà per scrì n test che sibe adressà sibe al'ëiles che ai ëi.

### 1.1 Forma dopla

La maniera plu prezisa de se adressé a ëiles y ëi ie l'adurvanza dla forma dopla, pra chëla che la varianta maschila y chëla feminila vën nunziedes esplizitamënter y per intier.

La forma dopla ademplësc al miec l tratamënt valif a livel linguistich, ajache sibe la forma maschila che chëla feminina vëgn nominades öna dlongia l'autra. Pra la forma dopla possen crì ora sce tò n iede la forma maschilaa y po chëla feminila o al cuntrer; n iede che n à crì ora dëssen po la adurvé ala medema maniera te dut l test. Da cunsïë te chësc contest iel plutosc che la forma feminila vénie numineda dan chëla maschila pervia dl'acuranza cun l verb.

#### 1.1.1 Forma dopla ntiera

Pra la forma dopla ntiera vën la forma maschila y la forma feminila nunziedes esplizitamënter y per ntier y liedes tres na cungiunzion (y/o) aldò dl senificat:

**La nsentiantes y i nsenianc** che tol pert al curs muessa se scrì ite dan la fin dl mëns.

Tl Ufize Cuestions linguistiche 3.2. iel da garat na stiera per **n tradutëur o na tradutëura** tl ladin badiot.

Aldò dl senificat possen adurvé chësta cungiunzioni:

**y:** la lieia elemënc defrènc y possa unì adurveda pra formes dopes (tl singuler y tl plurel) canche l ie minà almanco doi personnes, una per uni gender:

La sculées y i sculeies dla scola auta à l dërt de ...

Si fra **y si** sor ie unic ala gaurida dla mostra.

**o:** la cungiunzion "o" possa unì adurveda tl singuler. P.ej.:

Sce l debitëur **o** la debitëura ne paia nia l debit ti vëniel piniurà ...  
La presidënta **o** l presidënt vën lità per xx ani.

N possa adurvé la cungiunzion "o" tl plurel sce l ie minà duta l'ëiles o duc i ëi coche categories ntieres:

Dala cumpetizion uderan sce la sculées **o** i sculeies s'à njinià miec.

Sambën muessa po nce i articuli, i pronomi (y danz nce i verbs y eventualmënter i agetifs partizipie) uni adatei. Tlo iel deplù pusciblteies:

Mpede	miec
I partezipanc lascei pro y la partezipantes lascedes pro al ejam paia na chëuta de iscrizion.	La partezipantes y i partezipanc lascei pro al ejam paia na chëuta de iscrizion.
I candidac y la candidates che à passà l ejam scrit y che vën lascei pro y lascedes pro al ejam a usc paia na chëuta de iscrizion.	La candidates y i candidac che à passà l ejam scrit y che vën lascei pro al ejam a usc paia na chëuta de iscrizion. O: La candidates y i candidac che à passà l ejam scrit y possa fé l ejam a usc paia na chëuta de iscrizion.

Mo miec ie la reformulazion dla frasa:

**Chi che** fej l ejam muessa paië na chëuta de iscrizion.

**A chi che** tol pert al ejam ti vëniel damandà de paië na chëuta de iscrizion.

**Ti cajo de** superamënt dl ejam scrit y de amision al ejam a usc iel da paië na chëuta de iscrizion.

### 1.1.2 Formes doples curtes: rissa desbiech y cramples

La forma dopla lieda cun na rissa desbiech dassëssa mé unì adurveda te formuleres, inserac per stieres y te listes, ajache tesć cun la rissa desbiech ne se lascia nia liejer dant saurì. La rissa desbiech dassëssa n generel plutosc unì schiveda y mé adurveda sce la ne va nia autramënter, chèl uel dì sce l vën dant tl test truepa denuminatzions de ufizies, funzioni y personnes. Canche la forma dopla cun la rissa desbiech vën adurveda iel da mëter verda che la parola reste for grammaticalmënter drëta.

Nia	ma
I cunseler/a; I cunseler/cunseliera	I cunseler/la cunseliera i/la cunselieres
I laurant/a; I laurant/lauranta	I laurant/la lauranta
i/la lauranc	i lauranc/la laurantes
I espert/a; I espert/esperta	I espert/la esperta
i/la esperc	i esperc/la expertes

N generel iel assolutamënter da schivé massa risses desbiech:

nia	ma
I/la cunseler/cunseliera	I cunseler/la cunseliera
I/la espert/a	I espert/la esperta
I/la laurant/lauranta	I laurant/la lauranta
i/la lauranc/tes	i lauranc/la laurantes
I/la cunseler/cunseliera	I cunseler/la cunseliera

Da descensië **ie la cramples (a)** ajache les dà la mprescion che la varianta feminila sibe mé de mpurtanza segontera, p.ej. studënt (a).

La maniera plu prezisa ie l'adurvanza dla forma dopla, pra chëla che la varianta maschila y chëla feminila vén nunziedes esplizitamënter y per ntier. Da censië te chësc cuntest iel tlo oradechël che la forma feminila vénie nunzieda aldò dl moto "ladies first" dan chëla maschila pervia dla concordanza dl verb.

Sce la denuminazions muessa unì nunziedes for inò tl test, dantaldut te tesé plu lonc, véniel cunsìà de mudé ju cun d'autra formes, acioche l test ne devënte nia massa pesoch. Suvénz iel mesun schivé n'adurvanza massa repetitiva dla forma dopla tres la reformulazion dla frases. L ie de mpurtanza che la formes dopes – sce les vén adurvedes – vénie adurvedes tres dut l test y no mé datrai y les mudan ju cun l maschil generich, ajache scenó devënta chël che fova minà n "maschil generich" n maschil mé maschil y l ne fossa defin nia plu tler canche l test fej referimënt ai ëi y al'ëiles o mé ai ëi.

### 1.1.3 Formes dopes pra denuminazions de prufescion, de ncëria y de funzion

L'ëiles à la medema rejón di ëi de unì nunziedes cun si prufescion, si posizion y si funzions politiches o amministratives. L ie perchël de mpurtanza fundamentala che la denuminazions dla prufescions vénie fissedes esplizitamënter sibe tla forma maschila che te chëla feminila. Tla rujenedes tudëscia y taliana ie la denuminazions dla prufescions tla forma feminila preududes te despuzions defrëntes, per ejëmpl tl contrat coletif de cumpart dl 8 de merz 2006. Nce per ladin dassëssen adurvé la formes maschiles y chëles feminiles, acioche na rujeneda nia descriminënta posse se fé streda.

Tlo dessot iel n valgun ejëmpli de denuminazions maschiles y feminiles:

I assessëur	l'assessëura	I dutor primar	la dutora primara
I aucat	l'aucata	I ispetëur de traduzion	la ispetëura de traduzion
I buteghier	la buteghiera	I nseniant	la nsenianta
I cunselier provinziel	la cunseliera provinziela	I zipladëur	la zipladëura
I diretëur d'ufize	la diretëura d'ufize	I njenier	la njeniera

Te caji de sustantifs cumposc coche pra / studafuech, / mëinacrëp, / verdiabosch, / scoaciamin ie la formes feminiles:

la studafuech	la mëinacrëp	la verdiabosch	la scoaciamin
---------------	--------------	----------------	---------------

L medemo vel per:

I giudesc	la giudesc
-----------	------------

La desinënza **-ëssa** ne semea nia avëi tl ladin na sëur plutosc negativa coche tl talian, ma la ne ie nia for adateda. Bën válà pra formes cunesciudes sciche pra:

I sartëur	la sarturëssa	I prinz	la prinzëssa
-----------	---------------	---------	--------------

Prufescions cun la desinënza **-ëssa** ie suvénz prufescions tipicamënter feminiles, pra chëles che l ne ie deguna forma maschila o de chëles che la forma maschila ie atipica:

la sejeladrëssa	I sejeladëur	la majonëssa	I majoner (?)
la filadrëssa	I filadëur (?)	la badëssa	abat (?) prior (?)

La forma feminila normala ie chëla cun la njonta scëmpla dla desinënza **-a** sciche pra:

I ambolt	l'ambolta	I tradutëur	la tradutëura
I paür	la paura	I poet	la poeta
I prufessëur	la prufessëura	I autor	l'autora
I schiadëur	la schiadëura	I atëur	l'atëura
I scritëur	la scritëura	I ciantarin	la ciantarina
I letëur	la letëura	I scrivan	la scrivana
I zumpradëur	la zumpradëura	I traduteur	la traduëura

D'autra desinënzes feminiles ie chëles cun **-ga o gheda** sciche pra:

I cuech	la cuega	I mpiegà	la mpiegheda
---------	----------	----------	--------------

Cërtà prufescions ie per tradizion y usanza tipicamënter feminiles o maschiles.

#### maschiles:

I setëur (la setëura), I ugrister (la ugristera), I njenier (la njeniera), I fumé (la fumea??), I preve (la preva ??), I mecanicher (la mecanichera), I sigat (la sigata??) y n.i.

#### feminiles:

la fancela (I fant/I fancel (?) tlo muda I senificat aldò de sce la denuminazion vën adurveda tl maschil o feminil), la rëstla (I rëstladëur?), la ciasarina (I ciasarin?), l'ëifoma (I ëifom?), la badëssa, la secudienta (I secudient), la muta dai mutons (I mut dai mutons, o: "dai mutons y dala mutans" (?), la nëtacësa (I netacësa?), la ciulea (I ciulier), la oma dl di (I pere dl di)

La criazion y l'adurvanza dla forma respetivamënter maschila o feminila ne ie te chisc caji y generalmënter nia n problem linguistich, ma plutosc I problem de n se usé, n problem de azetanza y coche tl cajo de "muta dai mutons" na cuestzion de tan inant che n uel jì.

L mond se muda y cun ël se muda la rujeneda. Sce dan puec ani ne fovel povester mo tan che deguna ëiles a fé cér lëures nen iel sén assé o almanco n valgunes y chëstes à la rejon de unì numinedes. Ma co ti dijen pa a n'ëila che fej

I calighé	la calighea (?)	I pech	la peca (?)
I beché	la bechea (?)	I polizai (polizist)	la polizista (?)
I stradaruel	la stradaruela (?)	I general	la generala (?)

Da usservé iel che la prufescions tipicamënter feminiles god generalmënter de manco prestige y curespuend de solit a n livel de istruzion y païamënt scialdi plu bas che la prufescions tradiziunalmënter maschiles (cëla ejëmpli da dant). Ma nia mé, nce la denuminazions de lëures y funzions che vën adurvedes sibe per ëi che per ëiles à n'autra valënsa sce adurvedes tl maschil o tl feminil:

p.e. Secreter (particuler, generel, de Stat, de chemun y nsci inant)

ma: secretera (scrivana te n ufize, secretera dl Presidënt)

o: fant - fancela

## 1.2 Formulazions neutreles

Formulazions neutreles dassëssa unì nuzedes sciche alternativa y n alternanza ala formes doples per alesiré i tesć.

Adurvé tresora te n test mé formes doples fej deventé i tesć, dantaldut chëi plu lonc, scialdi pesoc. Nce mé na frasa longia cun de plu formes doples ie pesocia y nia tan saurida da capì:

Mpede	Miec
La culaburadëures y i culaburadëures dl'aministratzion provinziela dëssa udëi la zitadines y i zitadins sciche tlientes y tlienc, avisa coche la mprenditëures y i mprenditëures fej cun la cunsumadëures y i consumadëures y la prufessionistes liedies y i prufesciunisć liedesc cun si mandantes y si mandanc.	L personal dl'aministratzion provinziela dëssa vester daujin ala zitadines y ai zitadins avisa coche i/la mprenditëures y la personnes che lëura da prufessionistes liedies fej cun si tlientela.

La rujeneda pieta de plu formes d'espreszion neutrela:

### 1.2.1 Formes neutreles de denuminazion de personnes

Ejempli	
persona	persones jënt
personal	
forza de lëur	forzes de lëur
forza de ufize	forzes d'ufize
aiut	

Nia	ma
I spezialist	la persona spezialiseda
I espert	la persona esperta
I cunsulënt	la persona che cunsieia
i spezialisć	I personal spezialisà
i partezipanc	la jënt che tol pert
l'ëila che juda te cësadafuech	I aiut te cësadafuech

## Ejëmpl

*L personal* dla biblioteca che tol pert al curs muessa se scrì ite dan la fin dl mëns. *L ie prià* bel de dé ju na fotografia.

### 1.2.2 Sustantifs generics astrac

N'autra pusciblità ie chëla de se nuzé de **sustantifs generics astrac** (coletifs), de inuemes de funzions y istituzions.

Nia	ma
damandé aiut a n cunsulënt	se damandé na cunsulënza
damandé aiut a n spezialist	se damandé na cunsulënza spezialistica
I partezipanc giata n atestat che cunfermea che i à tèut pert al curs.	La partezipazion al curs vën cunfermeda da n atestat.

D'autra puscibleies ie:

Mpede	
I diretëur/la diretëura	la direzion
la cunlaurantes y i cunlauranc	la grupa, I team
la magistrates y i magistrac (o: i/la vicares, o: i/la giudesc) à tèut la dezijon...	la sunieria o la magistratura à tèut la dezijon...
la nseniantes y i nsenianc	I personal nseniant
i dependënc y la dependëntes	I personal dependënt

### 1.2.3 D'autra manieres de scrì

#### 1.2.3.1 Formulazions cun “chi che”

Mpede	
la studëntes y i studënc	chi che studieia
i candidac/la candidates	chi che se candidea
i parënc y la parëntes	chi che ie mparentà (o: la parentela)
i letëures y la letëures de chësc liber	chi che liej chësc liber
chi che ne à deguna lizënza, chël muessa	chi che ne à deguna lizënza, muessa
i zitadins se aspieta che l'autoriteies tole riesc tres la dumandes	chi che fej dumanda al'autoriteies se aspieta che la vénie tèuta tres aslune

### 1.2.3.2 Costruzions passives o descrizions verbales

Nia	ma
L damandant muessa njunté i documënc curespundënc	Ala dumanda muessel unì njuntà i documënc curespundënc (o: ala dumanda iel da njunté ...)
Detlarazion dl damandant o dla damandanta o de si reprejentant leghel	Detlarazion dla persona che damanda o che la reprejentea legalmënter

### 1.2.3.3 Adurvanza de n agetif mpede n sustantif maschil o feminil

Mpede	nsci
sunsëi dla dutora o dl dutor	cunsëi medich (o cunsëi saniter)
sucrët prufesciunel dl dutor o dla dutora	Sucrët prufesciunel medich

### 1.2.3.4 Adressamënt persunel

Te chëi tesć che se adressea diretamënter a personnes, uel dì te tesć che se damanda n tonn persunel (tesć de retlam, cuestioneres, tesć adressei a n publich) possen renunzië ala forma dopla se adressan diretamënter:

Nia	ma
L tlient/La tlienta possa dé ju si adres a ...	Pudëis dé ju vosta a ...

### 1.2.3.5 Co schivé massa denuminazions de personnes, de ncëries y funzions ndolauter

Mpede nsci	miec nsci
Ala cunferenza à nce tëut pert truepa franzëuses y truep franzëusc, talianes y talians coche nce greches y grecs.	Ala cunferenza à nce tëut pert truepa partcipantes y truep partcipanc dala Franzia, Talia y Grecia.
Cie che caraterisea personnes cristianes y cristians, budistes y budisć y muslims y muslimes ...	Cie che caraterisea personnes de crëidum cristian, budist y muslim ie...

### 1.2.3.6 Schivé I maschil generich

Mpede adurvé I maschil generich coche:	iel miec scri:
i Romans, i Greçs, i Ladins	I popul roman, I popul grech, la jënt ladina, la mendranza ladina, la populazion ladina y nsci inant

L ie sambën nce miec scri:

	mpede mé
fredesc y surans	fredesc
mutons y mutans	mutons
sculeies y sculées	sculeies

### 1.3 D'autra usservazions

N cont dla tematica de n'adurvanza nia descriminënta dla rujeneda possen tl ladin nce se nuzé dla forma mpersunela cun l verb (tlà forma ativa o passiva). Danz, vén la costruzion "L + verb" – indiretamënter y a livel de subcuscienza – assozieda al maschil. Perchël iela mé nchin a n cér pont neutrela.

#### 1.3.1 L + verb tlà forma passiva

Ejëmpli:

Mpede	miec nsci
I organisadëures se cruzierà che l vénie nce pità zeché da maië.	L unirà cialà che l posse nce unì pità zeché da maië.
I cunseleres de chemun lita ncuei sun la cuestzion dl trafich tl luech.	Te Cunsëi de chemun véniel ncuei lità sun la cuestzion dl trafich tl luech.

#### 1.3.2 N + verb tlà forma ativa

Autramënter iela cun la formulazion mpersunela "N+ verb". Te chësc cajo ne va l'assoziazion nia automaticamënter de viers dl senificat maschil. Perchël ie chësta forma da censië coche alternativa ala forma dopla.

Mpede	
I partezipanc y la partzipantes dla cunferënza muessa avëi l Green Pass	N possa partzipé ala cunferëenza sce n à l Green Pass
I/La aministradëures cialerà de purté inant la cuestzion tan riesc che la va.	N cialerà de purté inant la cuestzion tan riesc che la va.

#### 1.3.3 Tituli

Sce l'ëila à n titul dëssel nce unì nunzià. Suvënz véniel lascià ora.

L ie da schivé de dì o scrì:	I fossa miec scrì:
Ala senteda à tèut pert l dut. Gånsbacher, l dut. Kaufmann y la Erne.	Ala senteda à tèut pert l dut. Gånsbacher, l dut. Kaufmann y la dut.ra. Erne.

#### 1.3.4 Articuli

Na burta usanza ie nce chëla de mëter n **articul** dan l inuem feminil y nia dan chël maschil. Miec fossel traté tramedoi inuem for unfat: cun o zënsa articul:

no:	ma:
<u>La</u> Lamorgese y Draghi ie unic n pue' dant.	Lamorgese y Draghi ie unic n pue' dant. <i>O cie che n aud povester plu dinrer:</i> <u>La</u> Lamorgese y <u>I</u> Draghi ie unic n pue' dant.

### 1.3.5 Plurel

Datrai ie, dantaldut tl gherdëina, nce l **plurel** de utl per n'adurvanza nia descriminënta dla rujeneda. La forma feminila tl plurel dla paroles cun desinënza **-er/-or/-éur** curespuend ala forma maschila, perchèl:

p.ej. *dutores, prufessëures, secreteres* o: *i/la dutores, i/la scritëures, i/la atëures*

N ne possa y n ne uel sambën nia mudé strutures linguistiches che se à svilupà te cënc d'ani. Ma l ie de mpurtanza che n se rënde almanco cont che l ie cërtä formes y cér mecanisms che nfluenzea nosc pensé y nosc cumpurtamënc zënya che nëus se ntendon. A uni maniera pudons for cialé de nes nuzé de cërtä formes linguistiches mpede d'autres.

## 2 TRATAMËNT VALIF DL'ËILES TLA LEGISLAZION

Particulermënt de mpurtanza iel che l'adurvanza nia descriminënta dla rujeneda vénie respeteda te tesć normatifs (leges, regulamënc, directives) ajache nce chisc tesć ie adressei a duta la zitadinanza. Sambën iel miec sce n tén bel cont dl'adurvanza nia descriminënta dl lingaz tl mumënt dla redazion de chësta sort de tesć, chël uel dì, canche n scumëncia a i scri. Mudé l test te n segondo mumënt ie for plu rie.

Tesć normatifs, y dantaldut la leges, dassëssa vester tleres y da ntënder, i dëssa vester struturei aldò de na cërta logica y n dassëssa pudëi i liejer dant. L tratamënt valif de ëi y ëiles tl lingaz ne daussa nia gaujé melntendimënc o deficulcieies de cumprension dl cuntenut. La tlarëza giuridica muessa vester segureda. La formulazions ne dassëssa nia se defrenzië massa dala rujeneda adurveda normalmënter. Per garanti verscions medemes dla normes de lege tla rujeneda ladina, tudëscia y taliana dassëssa nce l test ladin unì formulà a na maniera nia descriminënta.

Pervia de dut chësc dassëssa i tesć normatifs unì scric tl respet de chisc princips. Ajache la normes legislatives ie tesć astrac adressei al publich, univel nchin nia da giut de regula adurvà la forma maschila n referimënt a ëi y a ëiles (maschil generich, p.ej. I zitadin, I cumpradëur, I laurant y nsçi inant). Ma davia che la populazion – o almanco pertes de chësta – sënt chësc, coche on dit, plu y plu sciche na descriminazion dl'ëila, iel sën de bujën de remplazé dlonch ulache l ie puscibl la forma mé maschila cun na forma che respetea la fundamënta de n tratamënt valif dl'ëila. Danz ne daussa la valorisazion d'identità de gender nia jì a dann dl cuntenut y smendrì la cumprension dla normes. Dala esperienzes fates ti ultimi ani àn udù che propi ti tesć normatifs che cuntën na lingia de terms giuridics, denuminazions de funzions y ncëries possa n'adurvanza faleda de formulazions nia descriminëntes vester n rëm per la lijiblità y la cumprension dl test y datrai nchinamei gaujé fai de nterpretazion. Per schivé che chësc suzede iel te vel' cajo de bujën de valuté coche l'adurvanza de n lingaz de gender posse unì praticheda tl particuler tenian cont dla strategies adatedes. Per chësc fin possen pra la normes legislatives tò n cunsidrazion la regules y la soluzions purtedes dant tla prima pert de chësta directives ma datrai iel nce bon tenì cont de n valguna particulariteies.

### 2.1 Formes doples ntieres y curtes

La formes doples ne dassëssa te n test normatif nia unì adurvedes massa suvënz, ajache les fajëssa l test drë massa pesoch y jissa contra l prinzip dla lijiblità. Da cunsïë iel perchël, sce la va, de se nuzé plutosc d'autra soluzions, p.ej. de formulazions sciche "persona che..." o "persona + agetif". De mpurtanza iel dantaldut, che l test reste tler, perchël iel ènghe da descensië de mescedé la formes doples cun la forma dl maschil generich ajache chësc menëssa a melntendimënc.

Te tesć normatifs dëssa la formes doples curtes (l dependënt/la dependënta, l cumpradëur/la cumpradëura, i/la dutores) plutosc unì schivedes, dantaldut ajache les ie de rëm canche l test vén liet dant (coche l vén p.ej. fat tl Cunsëi provinziel. La forma dopla ie azetabla canche l test cuntën listes (te chësc cajo possen, canche l test vén liet dant, liejer "y" o "o" mpede la rissa desbiech).

### 2.2 Soluzions criatives tla legislazion

#### 2.2.1 Chi che..

Chi che ne se tén nia a chësta despusizion ...

Chi che fej dumanda ...

#### 2.2.2 Formulazions y denuminazions neutreles

Sce l'azions per na cossa ie plu mpurtantes che la personnes che la fej ne muessa chësta ultimes nia unì numinedes.

Nsci	mpede
Ala dumanda iel da njunté chisc documënc	L damanant o la damananta muessa njunté chisc documënc ala dumanda.

Te tesć normatifs vëniel nce cunsià de se nuzé, canche la va y canche chësc ne cumporta nia n smendrimënt dla tlarëza dl test, de denuminazions neutreles (o astrates) mpede de denuminazions n referimënt a personnes:

	mpede
cunsulënsa	cunsulënc
zitudinanza	zitudins
persona spezialiseda	spezialist

### 2.2.3 Denuminazions coletives te tesć giuridics

Te tesć giuridics possa denuminazions coletives purté pro a schivé linges de denuminazions de personnes. Per ejempl possen scrì:

Mpede	nsci
magistrac y magistrates	dan sunieria
presidënc o presidëntes	la presidëenza
I diretëur o la diretëura	la direzion
consulënc y consulëntes	la consulënsa
i zitudins y les zitudines	la zitudinanza

Nce te chësc cajo vel I prinzip: I vën cunsià de adurvé denuminazions coletives, sce chëstes ne cumporta nia n smendrimënt dla tlarëza dl test.

### 2.2.4 Reformulazion dla frasa

**Reformulazion dla frasa:** Sce I ne ie nia mesun adurvé formulazions neutreles, ajache la prezijon dl test jissa perduda, dassëssen reformulé la frasa.

#### Ejempl de na reformulazion dla frasa

Test uriginel (che ne tén nia cont de n tratamënt valif)	Test mudà cun formes dopes (la cualità ie n pue' miëura ma nia iust bona)	Test scrit da nuef tl respet de n'adurvanza nia descriminënta dla rujeneda (zënsa mudazion dl cuntenut o smendrimënt dla tlarëza)
<b>I reprejentanc</b> dla repartizions provinzieles tla cumision chir ora danter ëi <b>n presidënt y n si vizepresidënt</b> . La ncëria de <b>scrivan</b> vën sëurantëuta da <b>n funzioner</b> dla repartizion provinziela nteressededa.	<b>I reprejentanc y la reprejentantes</b> dla repartizions provinzieles tla cumision (o: <b>i cumponënc y la cumponëntes dla cumision</b> ) chir ora danter ëi y èiles <b>n presidënt o na presidënta y si vizepresidënt o</b>	<b>La persone</b> che reprejentea la repartizions provinzieles tla cumision chir ora te si cërti na <b>persona sëurastanta y una n si sostituzion</b> . <b>N funzioner o na funzionera</b> dla repartizion

	<p>vizepresidënta. La ncëria de scrivan o scrivana vén sëurantëuta da n funzioner o da na funzionera dla repartizion provinziela nteresseda.</p>	<p>nteresseda sëurantol la ncëria de scrì l protocol.</p>
Cundizion per la ndividuazion de n ensemble ie l bënstä positif da pert de na cumision de <b>esperc</b> metuda adum:	<p>Cundizion per la ndividuazion de n ensemble ie l bënstä positif da pert de na cumision de <b>esperc y espertes</b> metuda adum:</p> <ul style="list-style-type: none"> <li>- da n reprejentant dla repartizion provinziela per i bëns culturei numinà dal <b>assessëur cumpetënt</b></li> <li>- da n reprejentant dla repartizion provinziela per i bëns culturei numinà dal <b>assessëur cumpetënt</b>.</li> </ul>	<p>Cundizion per la ndividuazion de n ensemble ie l bënstä positif de na cumision, te chëla che la repartizion provinziela per l'urbanistica y la repartizion provinziela per i bëns culturei ie reprejetedes da na persona numineda dal assessorat de cumpetëenza respetiva.</p>

## 2.3 Persones giuridiches y sogec de dërt

Per denuminé persones giuridiches véniel suvënz tèut paroles sciche p.ej. *purtadëur, sustenidëur, cunzesciuner, tituler, produtëur*, cun chëstes iel minà istituzions, sozieteies, autoriteies y n.i. y nia ëiles y ëi. Te chësc cajo véniel per l solit adurvà mé l maschil o l feminil aldò dla forma gramatichela dl soget. Sce n tulëssa la forma dopla purtëssa chësc a meintendimënc. P.ej.:

La sozietà, coche cunzesciunera dl mplant...

L Chemun ie l sustenidëur dl proiet...

I ènc ie i tituleres dla lizëンza ...

Dal'autra pert, canche l ie minà sogec de dërt publich ma nce persones singules, possel unì adurvà la forma dopla, p.ej.:

I utënc/La utëntes à l dërt de....

I responsabli/La responsables à da se présenté...

I/La pitadëures muessa publiché...

I/La tituleres de na lizëンza da fabriché...

**Davia che tl gherdëina ie la forma plurela dla paroles che fina cun -eur/-ëura y cun -er/-era la medema possa la forma dopla, coche on udù tl ejëmpl dessëura, nce mé unì aplicheda al articul (i/La pitadëures; i/La tituleres).**

## 2.4 Linges de denuminazions de persones, ncëries y funzions

L ie particulermënter rie scrì normes giuridiches canche la denuminazions de persones se porta pro suvënz, magari tl medemo coma. Chësc possa p.ej. vester l cajo pra statuc te chëi che l vén descrit la cumposizion de organs o gremiums.

Ma chi che se fej bele pensieres dan scrì l test y uel tenì cont dl fat che ëiles y ëi sibe da udëi ora ala medema maniera (cossa che ie pu dantaldut pra organs y gremiums de mpurtanza particulera, ulache la cuota dl'ëiles dassëssa unì auzeda) possa ressolver l problem a na maniera criativa y sostituì p.ej. denuminazions de funzions tres formulazions neutreles.

Per l solit va te chisc caji drët bën la formes doples cumbinedes cun soluzions criatives. Sambën possa de plu formes doples lieedes da n "o" vester de rëm per la lijibltà, dantaldut canche les vën dant tla medema frasa. Te chisc caji possen, acioche l test sibe plu tler, adurvé la rissa desbiech per na majera tlarëza; **ti tesć giurdics** muessa la **formes doples** a uni maniera **for unì scrites ora defin** (l Presidënt/la Presidënta, l sostitut/la sostituta).

## 2.5 Mudaziun de normes de lege

Te na lege scrita te n lingaz che ne tën nia cont dl'ëiles, uel dì tl nsci tlamà "maschil generich" (te chëles dates ora plu o manco dan l 2010) ne dëssen, tl cajo che l unissa mudà vel articul o coma de chësta lege, nia se nuzé de formes doples, ajache (coche on bele cunstatà dessëura), sce la formes doples vën mé adurvedes datrai y nia tres dut l test, devënta chël che fova n iede minà n "maschil generich" n maschil mé maschil y l ne fossa defin nia plu tler canche l test fej referimënt ai ëi y al'ëiles o mé ai ëi.

### 3 TESĆ AMINISTRATIFS N GENEREL

#### 3.1 Tesć administratifs che ie adressei a personnes singules

Te chisc tesć dassëssen for adurvé la forma spezifica feminila o maschila aldò dl bujën, chësc uel dì, aldò che la persona addresseda ie n'ëila o n ël. Perchël, sce n test ie mé adressà a n'ëila singula o a n ël singul o a na grupa de blo' ëiles o de blo' ëi, dëssen adressé chësta personnes diretamënter y persunalmënter.

<b>A</b> <b>Anna S.</b> Streda Mureda 0 39046 Urtijëi	<b>A</b> <b>Ujep S.</b> Streda Mureda 0 39046 Urtijëi
<b>Stimeda Anna S.</b> ai 11 de dezember ëis fat dumanda ...	<b>Stimà Ujep S.</b> ai 11 de dezember ëis fat dumanda ...

La lëtra resultea nsci scialdi plu persunela.

N cunsieia de memorisé doi verscions deprëntes aldò dl gender: una per i ëi y una per l'ëiles. A chësta maniera se sënt la zitadina o l zitadin adressei persunalmënter. Cun i programs d'elaborazion de tesć ne ie chësc tecnicamënter degun problem.

Mpede na verscion unica	doi verscions personalisedes per ëi y ëiles		
Stimà zitadin, stimeda zitadina	Stimeda inuem y cuiuenem,	Stimeda inuem y Stimà inuem y cuiuenem,	
sciche oma o pere che tira su si mut/muta da sëula o da sëul...	sciche persona che tira su si mut o muta da sëula...	sciche oma che tira su si mut o muta da sëul....	sciche pere che tira su si mut o muta da sëul....

#### 3.2 Formuleres y dumandes

Nce te tesć te chëi che la zitadines y i zitadins addressa l'aministratzion sciche pra formuleres, dumandes y cuestioneres iel miec renunzië al'adurvanza de formes doples (sibe per sparanië lerch che per na majera tlarëza). Ti cajo che les vën mpo adurvedes iel miec se nuzé dla forma dopla curta, uel dì de chëla cun la rissa desbiech. Ma a uni moda iel ti formuleres, coche dit, for miec abiné d'autra soluzions che la formes doples.

Dantaldut dassëssen schivé formulazions stereotipes coche: "sotscrizion dl pere". Plu drët fossel scri: "sotscrizion dla persona che à l dërt dl'educazion", o "sotscrizion dl'oma o dl pere".

#### Formuleres tla forma dl "IE"

Na bona soluzion per n'adurvanza nia descriminënt dl lingaz te formuleres ie chëla de se nuzé dl "IE", uel dì dla forma persunela che addressa diretamënter la zitadina o l zitadin. N formuler possa p.ej. unì formulà aldò de chësc model:

Dumanda XY / Detlarazion XY
le, _____
luech de nasciuda _____
data de nasciuda _____
cun residënsa a _____
damande de pudëi _____
feje dumanda (detlareie) che _____
Sotscrizion _____

Ulache l'aministratzion dà ndicazioni de co scì ora I formuler se pieta l'adressamënt cun na ndicazion direta. Chësta ndicazioni possa unì auzedes ora cun na scritura cursiva o cun n culëur. L vén nsci schivà la forma dopla y l stil ie scaaldi plu persunel.

Mpede nsci	iel miec nsci
Te chësc ciamp iel da scì l numer de codesc fischel dl damandant o dla damandanta.	<b>Scrijède</b> tlo ite vosc numer de codesc fischel.
Tlo dà l damandant/la damandanta sëura avisa duc i cuntribuc che ël/ëila giapa bele.	<b>Dajëde</b> sëura avisa ce cuntribuc che giapéis bele.
L damandant/La damandanta à da njunté chisc documënc: ...	Prëibel <b>njuntëde</b> chisc documënc: ...

#### Viariantes de n formuler aldò dla persona n cuestion

Tlo n'autra puscibltà de scì n formuler a na maniera spezifica aldò dl gender che possa ughé per schivé la formes doples.

Mpede na version sëula	miec formuleres separac per ëiles y ëi
L sotscrit/La sotscrita _____, tituler/titulera dla ustaria _____, ...	La sotscrita _____, titulera dla ustaria _____, ...

#### Formuleres che se nuza de puscibleies defrëntes de formulazions nia descriminëntes

Te uni cajo se lascel te formuleres cumbiné manieres defrëntes de formulazion nia descriminënta danter ëiles y ëi. La rissa desbiech possa unì adurveda, ma la denuminazion muessa resté grammaticalmenter drëta.

Mpede	miec nsci	o mo miec:
L/La sotscrita _____, mpiegà/gheda _____	L sotscrit/La sotscrita _____, mpiegà/mpiegheda _____, pra _____, damanda tlo si pensiunamënt.	le, inuem y cuinuem, che lëure te a feje damande de pudëi jì n pension.

\_\_\_\_\_, damanda tlo si  
pensiunamënt.

### 3.3 Avisc, ndicazions, cudejiei, material de nfurmazion y tesć semieñc

Nce te tesć che ie adressei a na grupa de personnes che dëssa dejéuwer cërta azions se pieta belau for **I adressamënt diret**. Repetizions de formes doples possa tlo vester pesoces. Oradechël ie l adressamënt diret scialdi plu persunel y respetea uni gender.

Mpede nsci	miec nsci
Consulënza a Bulsan	Consulënza a Bulsan
L cunsumadëur/La cunsumadëura possa damandé do pra la Zentrela Cunsumadëures a Bulsan.	Damandëde do pra nosta Zentrela Cunsumadëures a Bulsan.
Avis	Avis
L damandanta/La damandanta muessa ciarië ju l formuler y l salvé sun si njin. Dadedò possel/possela scrì ora l documënt. Sce no possel/possela nce stampé l documënt y l scrì ora a man.	Präibel ciariede ju l formuler sun vosc njin. Scrijëde ora l documënt salvà. Sce no pudéis ènghé stampé l formuler y l scrì ora a man.

### 3.4 Brosciures y d'autra publicacions

Ènghé brosciures, flyers, handouts y publicacions semientes ie n generel addressedes a n publich mescedà de personnes de gender defränt. Mpede se nuzé sistematicamënt de formes doples se lascel nce tlo cumbiné la pusciblteies defräntes dla formulazion nia descriminënta. Ala medema maniera ie nce tlo l adressamënt diret na soluzion scëmpla.

#### La imajes criedes cun la rujeneda tla publicacions – deguna reprezentazions stereotipes!

Sce l vén te publicacions, p.ej. te na broscura de nfurmazion o nce sun n placat, reprezentà situazions tres imajes, cun ejëmpli o descrizions, po iel da mëter verda che la personnes ne vénie nia reprejentedes a na maniera streotipa. Per ejëmpl l pere sciche chël che fej dumanda o chël che mantën la familia y l'ëila sciche casarina, l directeur y si secrétaire, l tutor y la nfermier...

Iust chësta reprezentazions stereotipes nfluenzea dassénn nosc pensé y ne curespuend bele da giut nia ala realità.

#### Cunsëies

Mustréde cun la imajes la varietà dla personnes defräntes.

Nuzëve nce de imajes de ëiles y de ëi te situazions atipiches.

Chiran ora situazions y cutesc che n ne se aspitëssa nia se lascel mëter n descuscion pregiudizes de viers de ëi y ëiles.

Mëtede verda te fotografies de grupa che degun gender ne vénie reprezentà a na maniera preferenzieda.

Cialëde che i gendri sibe reprejentei a na maniera valiva tla fotografies y imajes.

Cialëde nce tla didascalies che l test sibe scrit a na maniera nia descriminënta.<sup>3</sup>

<sup>3</sup> Geschlechtergerecht in Text und Bild – Università de Turic [Geschlechtergerecht in Word und Bild \(uzh.ch\)](#)

### 3.5 Tesć per l internet

Tesć per l internet muessa avēi carateristiches particuleres ajache i vēn liec autramēnter che i tesć stampei. Suvēnz vēni plutosc “scansiunei” che liec, perchēl iel de mpurtanza che l ti vēnie dat na strutura tlera, che si cumposizion sibe scēmpla y che l lingaz adurvà vēnia ntendù saurì acioche i/la letēures vēnie “piei” y “piedes” dal test y ne muce nia demez cun n tlīch. Chēsc vēn a se l dé p.ej. tres paroles tle, marcan (nia massa suvēnz) cērta paroles o frases tla drēta lueges, fajan tituli danterite y indesc cun merches internes da pudēi “sauté lessù” (link) y n.i.

Perchēl dassēssen te n test destinà al internet schivé massa formes doples. Mieciel alterné la formes doples cun formulazions neutreles, coche l on bele descrit dessēura te chēsta directives.

Per tesć tl internet uega nce **I adressamēnt diret y formes verbales**. Pra l adressamēnt diret se sēnt personnes de uni sés y gender addressedes.

Datrai iel rie renunziē ala formes doples, ma tres l adressamēnt diret fej ie n test for plu saurì da liejer y dantaldut plu persunel.

**Ejēmpli:**

Mpede nsci	mieci nsci
Êi y ëiles che ulëssa deventé nsenianc y nseniantes de matematica muessa fé n stude universiter.	Ulëis'a nseniē matematica? Po messëis fé n stude universiter.
Fumadëures che se sēnt amalei y amaledes y che uel lascé de fumé possa se censiē pra n dutor o na dutora a... .	Ne ve n stajëis'a nia bën y ulëis lascé de fumé? A ... giapëis n cunsëi medich.

## 4 CUNLUJION

Chësta directives ie da ntënder sciche impuls y ejëmpl d'urientamënt. Zënzauter fossel mo d'autra puscibleies de formulazion che jissa bën te caji spezifics. L ie n ciamp te chël che n possa vester criatifs y ulache n dëssa prué ora y se nuzé de formulazions defrëntes. Na rujeneda nia descriminënta ie na cuestion de ulëi: n possa scrì a na maniera che tën cont dla populazion feminila (che fej ora plu de mesa pert de duta la populazion). Sambën, n muessa nce se purvé n puech, sperimenté. L lingaz nia descriminënt se damanda n cér mpëni, ma belau dut va – sce n l uel. Che la rujeneda devënta pesocia y ne se lascia nia plu liejer ie mé dinrer vëira y suvënz iel mé na viertla per ne messëi nia crì soluzions defrëntes. Sce n se proa n pue' y cun n pue' de fantasia y criatività iel tan che for da giaté vel' soluzion che possa jì bën.

L ie tler che la maniera tradiziunela de scrì tesć amministratifs y de lege ne unirà nia mudeda da n di al auter, ma l ie n obietif a chël che l se paia miré. Per arjonjer chësc obietif iel nce de mpurtanza sensibilisé chi che scrij y chi che liej n cont dla tematica dl lingaz nia descriminënt. Cun n pue' de bona ulentà iel pona puscibl produjer tesć che adressea duta la populazion, ëiles y ëi ala medema maniera, y fé nsci n var de viers de na rujeneda plu giusta. Bon lëur!

## Bibliografia

Sabatini Alma, *Il sessismo nella lingua italiana*, Commissione Nazionale per la Parità e le Pari Opportunità tra uomo e donna, Presidenza del Consiglio dei Ministri, Roma, 1987.

Robustelli Cecilia, *Lingua e identità di genere*, in Serravalle E. (a cura di), *Saperi e libertà*, Progetto Polite, Associazione Italiana Editori, Milano, 2000, pp. 53-68.

Robustelli Cecilia y Kustatscher Gabriella, *Buongiorno dottoressa*, Cumision per la valivanza dla chances y la valorisazion de gender dl'Azienda sanitera dl Südtirol, Bulsan, 2008.

*La neutralità di genere nel linguaggio usato al Parlamento europeo*, dat ora dal Parlament europeich, 2008.

*Geschlechtergerechte Sprache*, Leitfaden zum geschlechtergerechten Formulieren im Deutschen, Schweizerische Bundeskanzlei, Bern, 2009 [Leitfaden zum geschlechtergerechten Formulieren \(admin.ch\)](#)

Geschlechtergerechte Behördentexte, linguistische Untersuchungen und Stimmen zur Umsetzung in der mehrsprachigen Schweiz. Forschungsbericht. Hrsg.: Daniel Elmiger, Verena Tunger, Eva Schaeffel-Lacroix, Université Genève, 2017.

## D'autra funtanes

Umgang mit dem Genderstern und ähnlichen Schreibweisen in deutschsprachigen Texten des Bundes. Weisung und Erläuterungen der Schweizerischen Bundeskanzlei vom 15. Juni 2021

Adam, Eva und die Sprache – Beiträge zur Geschlechterforschung, Karin M. Eichhoff-Cyrus, Dudenverlag, Wiesbaden 2004

Fingerzeige für die Gesetzes- und Amtssprache, Ulrich Daum, Quelle&Meyer, Wiesbaden 1998

Geschlechtergerecht in Text und Bild – Universität Zürich [Geschlechtergerecht in Word und Bild \(uzh.ch\)](#)

Sprachliche Gleichbehandlung von Frauen und Männern – Hinweise, Anwendungsmöglichkeiten und Beispiele, Bundesstelle für Büroorganisation und Bürotechnik, Bundesverwaltungsamt, 2. Auflage, 2002

DUDEN, Die deutsche Rechtschreibung, 28. Auflage, Wiesbaden, 2020 (Übersicht Geschlechtergerechter Sprachgebrauch)

DUDEN, Handbuch geschlechtergerechte Sprache, Gabriele Diewald, Anja Steinhauer, 1. Auflage 2020

## Brosciures, cudejiei de cunsulența, links ală tematica de n lingaz nia descriminent

DUDEN, Richtig gendern: Wie Sie angemessen und verständlich schreiben, Anja Steinhauer, Gabriele Diewald, 1. Auflage 2017

Genderleicht.de (Gendern in Medien – Nützliche Tipps & Tools für diskriminierungsfreies Schreiben und Sprechen) [www.genderleicht.de](#)

Kompendium gendersensible Sprache – Strategien zum fairen Formulieren: [Kompendium gendersensible Sprache \(bdkom.de\)](#) Herausgeber: Bundesverband der Kommunikatoren e. V.

Geschickt gendern – Das Genderwörterbuch: [geschicktgendern.de](#)

gender app Geschlechtergerechte Sprache: [genderapp.org](#)

Vocabuler dl gender [www.genderator.app/wb/index.aspx](#)